

**Դիվանագիտական հարաբերությունների մասին 1961 թվականի՝ Վիեննայի  
Կոնվենցիայի քաղաքացիություն ձեռք բերելու մասին ֆակուլտատիվ  
Արձանագրություն**

Սույն Արձանագրության, ինչպես նաև 1961 թվականի մարտի 2-ից մինչև ապրիլի 14-ը Վիեննայում կայացած Միավորված ազգերի կազմակերպության կոնֆերանսի կողմից ընդունված «Դիվանագիտական հարաբերությունների մասին Վիեննայի կոնվենցիայի, այսուհետ՝ Կոնվենցիա, մասնակից պետությունները, արտահայտելով իրենց դիվանագիտական ներկայացուցչությունների անդամների և նրանց ընտանիքների՝ նրանց հետ միասին ապրող անդամների կողմից քաղաքացիություն ձեռք բերելու վերաբերյալ կանոններ սահմանելու իրենց ցանկությունը,

համաձայնեցին ներքոհիշյալի մասին.

**Հոդված 1**

Սույն Արձանագրության նպատակների համար «ներկայացուցչության անդամներ» արտահայտությունը ունի Կոնվենցիայի 1-ին հոդվածի 1-ին կետի «b» ենթակետում տրված նշանակությունը, այսինքն՝ «ներկայացուցչության ղեկավար և ներկայացուցչության անձնակազմի անդամներ»:

**Հոդված 2**

Ընդունող պետության քաղաքացիներ չհանդիսացող ներկայացուցչության անդամները և նրանց ընտանիքների՝ նրանց հետ միասին ապրող անդամները ձեռք չեն բերում այդ պետության քաղաքացիություն, ոչ այլ կերպ քան, ըստ ընդունող պետության օրենսդրության կիրարկման կարգի:

**Հոդված 3**

Սույն Արձանագրությունը ստորագրման համար բաց է բոլոր այն պետությունների համար, որոնք Կոնվենցիայի մասնակից կղառնան մինչև 1961 թվականի հոկտեմբերի 31-ը՝ Ավստրիայի արտաքին գործերի դաշնային նախարարությունում, իսկ այնուհետև, մինչև 1962 թվականի մարտի 31-ը՝ Միավորված ազգերի կազմակերպության կենտրոնակայանում՝ Նյու Յորքում:

**Հոդված 4**

Սույն Արձանագրությունը ենթակա է վավերացման: Վավերագրերը հանձնվում են ի պահ Միավորված ազգերի կազմակերպության Գլխավոր քարտուղարին:

**Հոդված 5**

Սույն Արձանագրությունը բաց է դրան միանալու համար բոլոր այն պետությունների համար, որոնք կղառնան Կոնվենցիայի մասնակիցներ: Միանալու մասին ակտերը ի պահ են հանձնվում Միավորված ազգերի կազմակերպության Գլխավոր քարտուղարին:

**Հոդված 6**

1. Սույն Արձանագրությունը ուժի մեջ է մտնում ճիշտ նույն օրը, ինչ և Կոնվենցիան կամ Արձանագրության վավերացման կամ միանալու մասին երկրորդ ակտը Միավորված ազգերի կազմակերպության Գլխավոր քարտուղարին ի պահ հանձնելուց հետո երեսուներորդ օրը՝ կախված այն բանից, թե այդ ամսաթվից որը ավելի ուշ կլինի:

2. Յուրաքանչյուր այն պետության համար, որը կվավերացնի սույն Արձանագրությունը կամ դրան կմիանա սույն հոդվածի 1-ին կետին համապատասխան այն ուժի մեջ մտնելուց հետո, Արձանագրությունը ուժի մեջ կմտնի այդ պետության կողմից իր վավերագիրը կամ միանալու մասին ակտը ի պահ հանձնելուց հետո երեսուներորդ օրը:

### **Հոդված 7**

Միավորված ազգերի կազմակերպության գլխավոր քարտուղարը, բոլոր այն պետություններին, որոնք կդառնան Կոնվենցիայի մասնակիցներ, ծանուցում է՝

ա) սույն Արձանագրությունը 3-րդ, 4-րդ և 5-րդ հոդվածներին համապատասխան, ստորագրելու, վավերացնելու կամ միանալու մասին ակտերը ի պահ հանձնելու մասին,

բ) սույն Արձանագրությունը, 6-րդ հոդվածին համապատասխան, ուժի մեջ մտնելու ամսաթվի մասին:

### **Հոդված 8**

Սույն Արձանագրության բնագիրը, որի անգլերեն, իսպաներեն, չինարեն, ռուսերեն և ֆրանսերեն տեքստերը հավասարազոր են, ի պահ կհանձնվի Միավորված ազգերի կազմակերպության գլխավոր քարտուղարին, որը դրա վավերացված պատճենները կուղարկի 5-րդ հոդվածում նշված բոլոր պետություններին:

Ի հավաստումն որի՝ ներքոստորագրյալները, պատշաճ կերպով լիազորված իրենց Կառավարությունների կողմից, ստորագրեցին սույն Արձանագրությունը:

Կատարված է Վիեննայում 1961 թվականի ապրիլի 18-ին:

**\*Արձանագրությունը Հայաստանի Հանրապետության համար ուժի մեջ է մտել 1993 թվականի հուլիսի 23-ից:**